



Saunoaga Autu a le Afioga i le Palemia - Tuilaepa Sailele Malielegaoi (Digital TV Launch)

O le tatala aloaia o lenei fa'amoemoe, o se tasi lea o miti a le Malo ua taunuu. Ina ia si'isi'i ai le lelei faifai pea o auauauna fa'asalalauga tau TV. Sa fa'asalalau mo tauofoga ma manumalo ai le Kamupani o le Samoa Digital Communication Limited, ua fa'apuupuuna i le SDCL, e latou te fa'atinoina lea fa'amoemoe. O le SDCL o se kamupani e umia e se tasi o tamali'i faipisinisi o si o tatou atunuu le Afioga ia Tuiaopo Fa'amausili Andrew Ah Liki. O le tausaga e 2018 na amata fa'atino ai e le SDCL lenei atina'e lea ua tatalaina i le aso.

I le 1993, na amata ai le atina'e lenei o fa'asalalauga tau TV, i le vaitaimi a o Palemia le Afioga ia Tofilau Eti Alesana. Ma sa talafetai ma le manumalo ai o le tatou Manu Samoa i le Ipu o le Hong Kong Sevens. Sa telê le aoga o lenei atina'e ona ua mafai ai lava e o tatou tagatanuu ona maimoa i ta'alogalaga lakapi faasalalau sao mai i malae o le lalolagi o loo taaalo ai. Ae peitai ane, sa na o sina vaega o le atunuu na fa'asopolia ma mauaina lea auauauna i lenei vaitaimi. Sa faigata e fale-televisi ona fa'asopolia Samoa atoa. Ae peitai o le tatalaina o le TV lenei, o le a mafai ona maua ai e Samoa atoa faasalalauga tau TV. Ma o le a iai alalafaga o le a mauaina mo le taimi muamua lenei auauauna. O le Vaega muamua lenei o le atina'e lenei ma o le 'ā fa'aolaina amata atu i le aso, ma faasopolia ai le 70% o le atunuu. O le a fa'amaeaina i le fa'aiuga o Novema 2019 le Vaega 2 ma le Vaega Iona 3 e faamaea i le amataga o le 2020 ona TV loaloa ai lea o Samoa atoa.

O le lalolagi ma le ta'aviliga ua agai iai lenei vaitau ua telê le fa'ataua o fa'asalalauga o ata TV ma telefoni eseese o mea e tutupu i aso uma i so o se tulimanu o le lalolagi O le a tele polokalame e mitamita ai si o tatou atunuu, e atagia ai tatou tu ma agaifanua, aemaise faiganuu lelei ma tapuaiga fa'a-kerisiano.

O le a maua ai avanoa tutusa mo galuega fa'a-inisinia, le maketiina ma le 'aufai polokalame. E le gata i le fa'atupu o le tomai o tatou tagata, ao le agavaa fa'avaomalo e mafai ai ona faigaluega tagata Samoa i is iatunuu i fafo e fa'aaoga ai nei suigafou. O le isi aoga o lenei fa'amoemoe o le toe fetu'utu'unai ai lea o alaleo ma tapena ai le fa'atulagana fou mo le tele o auauauna taua o lo'o fuafua mo le digital fou. Ae o le sini autu o lenei fa'amoemoe, o le avea lea o Samoa ma taulaiga tutotonu (hub) o nei auauauna mo le itulagi o le Pasefika. E le gata mo tekonoosi fou, ae o le taleni ma le tomai o tatou tagata e tutupu ma fa'afailele atu i Samoa nei.

Malo le tapuai fa'afetai le tatalo. O lenei ua taunuu ma le manuia le Vaega Muamua o lenei atina'e tele. Sa galulue iai le Ofisa o le Pule Fa'atonu faapea le Kamupani fai TV o le SDCL ma Fale televisio o lo'o iai e tatala faasolosolo si a tatou mea. 70% i le aso - Vaega 2 ia Novema ae 100% i le amataga o le tausaga fou.

Soifua ma ia manuia.